

## Evangelium secundum Marcum

---

**Cap. 1** <sup>1</sup> Initium Evangelii Jesu Christi, Filii Dei.

<sup>2</sup> Sicut scriptum est in Isaia propheta :

Ecce ego mitto angelum meum ante faciem tuam,  
qui præparabit viam tuam ante te.

<sup>3</sup> Vox clamantis in deserto :

Parate viam Domini, rectas facite semitas ejus.

<sup>4</sup> Fuit Joannes in deserto baptizans, et prædicans  
baptismum pœnitentiæ in remissionem peccatorum. <sup>5</sup> Et  
egrediebatur ad eum omnis Judææ regio, et  
Jerosolymitæ universi, et baptizabantur ab illo in Jordanis  
flumine, confitentes peccata sua. <sup>6</sup> Et erat Joannes  
vestitus pilis cameli, et zona pellicea circa lumbos ejus, et  
locustas et mel silvestre edebat. <sup>7</sup> Et prædicabat dicens :  
Venit fortior post me, cujus non sum dignus procumbens  
solvere corrigiam calceamentorum ejus. <sup>8</sup> Ego baptizavi  
vos aqua, ille vero baptizabit vos Spiritu Sancto.

<sup>9</sup> Et factum est : in diebus illis venit Jesus a Nazareth  
Galilææ : et baptizatus est a Joanne in Jordane. <sup>10</sup> Et  
statim ascendens de aqua, vidit cælos apertos, et  
Spiritus tamquam columbam descendentem, et  
manentem in ipso. <sup>11</sup> Et vox facta est de cælis : Tu es Filius  
meus dilectus, in te complacui.

<sup>12</sup> Et statim Spiritus expulit eum in desertum. <sup>13</sup> Et erat in  
deserto quadraginta diebus, et quadraginta noctibus : et  
tentabatur a Satana : eratque cum bestiis, et angeli  
ministrabant illi.

<sup>14</sup> Postquam autem traditus est Joannes, venit Jesus in  
Galilæam, prædicans Evangelium regni Dei, <sup>15</sup> et dicens :  
Quoniam impletum est tempus, et appropinquavit regnum  
Dei : pœnitementi, et credite Evangelio. <sup>16</sup> Et præteriens  
secus mare Galilææ, vidit Simonem, et Andream fratrem  
ejus, mittentes retia in mare (erant enim piscatores), <sup>17</sup> et  
dixit eis Jesus : Venite post me, et faciam vos fieri

piscatores hominum. **18** Et protinus relictis retibus, secuti sunt eum. **19** Et progressus inde pusillum, vidit Jacobum Zebedæi, et Joannem fratrem ejus, et ipsos componentes retia in navi : **20** et statim vocavit illos. Et relicto patre suo Zebedæo in navi cum mercenariis, secuti sunt eum.

**21** Et ingrediuntur Capharnaum : et statim sabbatis ingressus in synagogam, docebat eos. **22** Et stupebant super doctrina ejus : erat enim docens eos quasi potestatem habens, et non sicut scribæ. **23** Et erat in synagoga eorum homo in spiritu immundo : et exclamavit, **24** dicens : Quid nobis et tibi, Jesu Nazarene ? venisti perdere nos ? scio qui sis, Sanctus Dei. **25** Et comminatus est ei Jesus, dicens : Obmutesce, et exi de homine. **26** Et discerpens eum spiritus immundus, et exclamans voce magna, exiit ab eo. **27** Et mirati sunt omnes, ita ut conquirent inter se dicentes : Quidnam est hoc ? quænam doctrina hæc nova ? quia in potestate etiam spiritibus immundis imperat, et obediunt ei. **28** Et processit rumor ejus statim in omnem regionem Galilææ.

**29** Et protinus egredientes de synagoga, venerunt in domum Simonis et Andreæ, cum Jacobo et Joanne. **30** Decumbebat autem socrus Simonis febricitans : et statim dicunt ei de illa. **31** Et accedens elevavit eam, apprehensa manu ejus : et continuo dimisit eam febris, et ministrabat eis.

**32** Vespere autem facto cum occidisset sol, afferebant ad eum omnes male habentes, et dæmonia habentes : **33** et erat omnis civitas congregata ad januam. **34** Et curavit multos, qui vexabantur variis languoribus, et dæmonia multa ejiciebat, et non sinebat ea loqui, quoniam sciebant eum.

**35** Et diluculo valde surgens, egressus abiit in desertum locum, ibique orabat. **36** Et persecutus est eum Simon, et qui cum illo erant. **37** Et cum invenissent eum, dixerunt ei :

Quia omnes quærunt te. <sup>38</sup> Et ait illis : Eamus in proximos vicos, et civitates, ut et ibi prædicem : ad hoc enim veni.

<sup>39</sup> Et erat prædicans in synagogis eorum, et in omni Galilæa, et dæmonia ejiciens.

<sup>40</sup> Et venit ad eum leprosus deprecans eum : et genu flexo dixit ei : Si vis, potes me mundare. <sup>41</sup> Jesus autem misertus ejus, extendit manum suam : et tangens eum, ait illi : Volo : mundare. <sup>42</sup> Et cum dixisset, statim discessit ab eo lepra, et mundatus est. <sup>43</sup> Et comminatus est ei, statimque ejecit illum, <sup>44</sup> et dicit ei : Vide nemini dixeris : sed vade, ostende te principi sacerdotum, et offer pro emundatione tua, quæ præcepit Moyses in testimonium illis. <sup>45</sup> At ille egressus cœpit prædicare, et diffamare sermonem, ita ut jam non posset manifeste introire in civitatem, sed foris in desertis locis esset, et conveniebant ad eum undique.

**Cap. 2** <sup>1</sup> Et iterum intravit Capharnaum post dies, <sup>2</sup> et auditum est quod in domo esset, et convenerunt multi, ita ut non caperet neque ad januam, et loquebatur eis verbum. <sup>3</sup> Et venerunt ad eum ferentes paralyticum, qui a quatuor portabatur. <sup>4</sup> Et cum non possent offerre eum illi præ turba, nudaverunt tectum ubi erat : et patefacientes submiserunt grabatum in quo paralyticus jacebat. <sup>5</sup> Cum autem vidisset Jesus fidem illorum, ait paralytico : Fili, dimittuntur tibi peccata tua. <sup>6</sup> Erant autem illic quidam de scribis sedentes, et cogitantes in cordibus suis : <sup>7</sup> Quid hic sic loquitur ? blasphemat. Quis potest dimittere peccata, nisi solus Deus ? <sup>8</sup> Quo statim cognito Jesus spiritu suo, quia sic cogitarent intra se, dicit illis : Quid ista cogitatis in cordibus vestris ? <sup>9</sup> Quid est facilius dicere paralytico : Dimittuntur tibi peccata tua : an dicere : Surge, tolle grabatum tuum, et ambula ? <sup>10</sup> Ut autem sciatis quia Filius hominis habet potestatem in terra dimittendi peccata (ait paralytico), <sup>11</sup> tibi dico : Surge, tolle grabatum tuum, et vade in domum tuam. <sup>12</sup> Et statim surrexit ille : et, sublato grabato, abiit coram omnibus, ita ut mirarentur omnes, et

honorificent Deum, dicentes : Quia numquam sic vidimus.

**13** Et egressus est rursus ad mare, omnisque turba veniebat ad eum, et docebat eos. **14** Et cum præteriret, vidit Levi Alphæi sedentem ad telonium, et ait illi : Sequere me. Et surgens secutus est eum. **15** Et factum est, cum accumberet in domo illius, multi publicani et peccatores simul discumbebant cum Jesu et discipulis ejus : erant enim multi, qui et sequebantur eum. **16** Et scribæ et pharisæi videntes quia manducaret cum publicanis et peccatoribus, dicebant discipulis ejus : Quare cum publicanis et peccatoribus manducat et bibit Magister vester ? **17** Hoc audito Jesus ait illis : Non necesse habent sani medico, sed qui male habent : non enim veni vocare justos, sed peccatores. **18** Et erant discipuli Joannis et pharisæi jejunantes : et veniunt, et dicunt illi : Quare discipuli Joannis et pharisæorum jejunant, tui autem discipuli non jejunant ? **19** Et ait illis Jesus : Numquid possunt filii nuptiarum, quamdiu sponsus cum illis est, jejunare ? Quanto tempore habent secum sponsum, non possunt jejunare. **20** Venient autem dies cum auferetur ab eis sponsus : et tunc jejunabunt in illis diebus. **21** Nemo assumentum panni rudis assuit vestimento veteri : alioquin aufert supplementum novum a veteri, et major scissura fit. **22** Et nemo mittit vinum novum in utres veteres : alioquin dirumpet vinum utres, et vinum effundetur, et utres peribunt : sed vinum novum in utres novos mitti debet.

**23** Et factum est iterum Dominus sabbatis ambularet per sata, et discipuli ejus cœperunt progredi, et vellere spicas. **24** Pharisæi autem dicebant ei : Ecce, quid faciunt sabbatis quod non licet ? **25** Et ait illis : Numquam legistis quid fecerit David, quando necessitatem habuit, et esuriit ipse, et qui cum eo erant ? **26** quomodo introibit in domum Dei sub Abiathar principe sacerdotum, et panes propositionis manducavit, quos non licebat manducare, nisi sacerdotibus, et dedit eis qui cum eo erant ? **27** Et

dicebat eis : Sabbatum propter hominem factum est, et non homo propter sabbatum. <sup>28</sup> Itaque Dominus est Filius hominis, etiam sabbati.

**Cap. 3** <sup>1</sup> Et introivit iterum in synagogam : et erat ibi homo habens manum aridam. <sup>2</sup> Et observabant eum, si sabbatis curaret, ut accusarent illum. <sup>3</sup> Et ait homini habenti manum aridam : Surge in medium. <sup>4</sup> Et dicit eis : Licet sabbatis benefacere, an male ? animam salvam facere, an perdere ? At illi tacebant. <sup>5</sup> Et circumspiciens eos cum ira, contristatus super cæcitate cordis eorum, dicit homini : Extende manum tuam. Et extendit, et restituta est manus illi. <sup>6</sup> Exeuntes autem pharisæi, statim cum Herodianis consilium faciebant adversus eum quomodo eum perderent.

<sup>7</sup> Jesus autem cum discipulis suis secessit ad mare : et multa turba a Galilæa et Judæa secuta est eum, <sup>8</sup> et ab Jerosolymis, et ab Idumæa, et trans Jordanem : et qui circa Tyrum et Sidonem multitudo magna, audientes quæ faciebat, venerunt ad eum. <sup>9</sup> Et dicit discipulis suis ut navicula sibi deserviret propter turbam, ne comprimerent eum : <sup>10</sup> multos enim sanabat, ita ut irruerent in eum ut illum tangerent, quotquot habebant plagas. <sup>11</sup> Et spiritus immundi, cum illum videbant, procidebant ei : et clamabant, dicentes : <sup>12</sup> Tu es Filius Dei. Et vehementer comminabatur eis ne manifestarent illum.

<sup>13</sup> Et ascendens in montem vocavit ad se quos voluit ipse : et venerunt ad eum. <sup>14</sup> Et fecit ut essent duodecim cum illo : et ut mitteret eos prædicare. <sup>15</sup> Et dedit illis potestatem curandi infirmitates et ejiciendi dæmonia. <sup>16</sup> Et imposuit Simoni nomen Petrus : <sup>17</sup> et Jacobum Zebedæi, et Joannem fratrem Jacobi, et imposuit eis nomina Boanerges, quod est, Filii tonitruum : <sup>18</sup> et Andræam, et Philippum, et Bartholomæum, et Matthæum, et Thomam, et Jacobum Alphæi, et Thaddæum, et Simonem Cananæum, <sup>19</sup> et Judam Iscariotem, qui et

tradidit illum.

**20** Et veniunt ad domum : et convenit iterum turba, ita ut non possent neque panem manducare. **21** Et cum audissent sui, exierunt tenere eum : dicebant enim : Quoniam in furorem versus est. **22** Et scribæ, qui ab Jerosolymis descenderant, dicebant : Quoniam Beelzebub habet, et quia in principe dæmoniorum ejicit dæmonia.

**23** Et convocatis eis in parabolis dicebat illis : Quomodo potest Satanus Satanam ejicere ? **24** Et si regnum in se dividatur, non potest regnum illud stare. **25** Et si domus super semetipsam dispertiatur, non potest domus illa stare. **26** Et si Satanus consurrexerit in semetipsum, dispertitus est, et non poterit stare, sed finem habet.

**27** Nemo potest vasa fortis ingressus in domum diripere, nisi prius fortem alliget, et tunc domum ejus diripiet.

**28** Amen dico vobis, quoniam omnia dimittentur filiis hominum peccata, et blasphemiam quibus blasphemaverint : **29** qui autem blasphemaverit in Spiritum Sanctum, non habebit remissionem in æternum, sed reus erit æterni delicti. **30** Quoniam dicebant : Spiritum immundum habet.

**31** Et veniunt mater ejus et fratres : et foris stantes miserunt ad eum vocantes eum, **32** et sedebat circa eum turba : et dicunt ei : Ecce mater tua et fratres tui foris quærunt te. **33** Et respondens eis, ait : Quæ est mater mea et fratres mei ? **34** Et circumspiciens eos, qui in circuitu ejus sedebant, ait : Ecce mater mea et fratres mei. **35** Qui enim fecerit voluntatem Dei, hic frater meus, et soror mea, et mater est.

**Cap. 4** **1** Et iterum cœpit docere ad mare : et congregata est ad eum turba multa, ita ut navim ascendens sederet in mari, et omnis turba circa mare super terram erat : **2** et docebat eos in parabolis multa, et dicebat illis in doctrina sua : **3** Audite : ecce exiit

seminans ad seminandum. <sup>4</sup> Et dum seminat, aliud cecidit circa viam, et venerunt volucres cæli, et comederunt illud.

<sup>5</sup> Aliud vero cecidit super petrosa, ubi non habuit terram multam : et statim exortum est, quoniam non habebat altitudinem terræ : <sup>6</sup> et quando exortus est sol, exæstuavit : et eo quod non habebat radicem, exaruit.

<sup>7</sup> Et aliud cecidit in spinas : et ascenderunt spinæ, et suffocaverunt illud, et fructum non dedit. <sup>8</sup> Et aliud cecidit in terram bonam : et dabat fructum ascendentem et crescentem, et afferebat unum triginta, unum sexaginta, et unum centum. <sup>9</sup> Et dicebat : Qui habet aures audiendi, audiat. <sup>10</sup> Et cum esset singularis, interrogaverunt eum hi qui cum eo erant duodecim, parabolam. <sup>11</sup> Et dicebat eis : Vobis datum est nosse mysterium regni Dei : illis autem, qui foris sunt, in parabolis omnia fiunt : <sup>12</sup> ut videntes videant, et non videant : et audientes audiant, et non intelligant : nequando convertantur, et dimittantur eis peccata.

<sup>13</sup> Et ait illis : Nescitis parabolam hanc ? Et quomodo omnes parabolas cognoscetis ? <sup>14</sup> Qui seminat, verbum seminat. <sup>15</sup> Hi autem sunt, qui circa viam, ubi seminatur verbum, et cum audierint, confestim venit Satanas, et aufert verbum, quod seminatum est in cordibus eorum. <sup>16</sup> Et hi sunt similiter, qui super petrosa seminantur : qui cum audierint verbum, statim cum gaudio accipiunt illud : <sup>17</sup> et non habent radicem in se, sed temporales sunt : deinde orta tribulatione et persecutione propter verbum, confestim scandalizantur. <sup>18</sup> Et alii sunt qui in spinas seminantur : hi sunt qui verbum audiunt, <sup>19</sup> et ærumnæ sæculi, et deceptio divitiarum, et circa reliqua concupiscentiæ introëunt suffocant verbum, et sine fructu efficitur. <sup>20</sup> Et hi sunt qui super terram bonam seminati sunt, qui audiunt verbum, et suscipiunt, et fructificant, unum triginta, unum sexaginta, et unum centum.

<sup>21</sup> Et dicebat illis : Numquid venit lucerna ut sub modo

ponatur, aut sub lecto ? nonne ut super candelabrum ponatur ? **22** Non est enim aliquid absconditum, quod non manifestetur : nec factum est occultum, sed ut in palam veniat. **23** Si quis habet aures audiendi, audiat. **24** Et dicebat illis : Videte quid audiatis. In qua mensura mensi fueritis, remetietur vobis, et adjicietur vobis. **25** Qui enim habet, dabitur illi : et qui non habet, etiam quod habet auferetur ab eo.

**26** Et dicebat : Sic est regnum Dei, quemadmodum si homo jaciat sementem in terram, **27** et dormiat, et exurgat nocte et die, et semen germinet, et increscat dum nescit ille. **28** Ultra enim terra fructificat, primum herbam, deinde spicam, deinde plenum frumentum in spica. **29** Et cum produxerit fructus, statim mittit falcem, quoniam adsit messis. **30** Et dicebat : Cui assimilabimus regnum Dei ? aut cui parabolæ comparabimus illud ? **31** Sicut granum sinapis, quod cum seminatum fuerit in terra, minus est omnibus seminibus, quæ sunt in terra : **32** et cum seminatum fuerit, ascendit, et fit majus omnibus oleribus, et facit ramos magnos, ita ut possint sub umbra ejus aves cæli habitare. **33** Et talibus multis parabolis loquebatur eis verbum, prout poterant audire : **34** sine parabola autem non loquebatur eis : seorsum autem discipulis suis disserebat omnia.

**35** Et ait illis in illa die, cum sero esset factum : Transeamus contra. **36** Et dimittentes turbam, assumunt eum ita ut erat in navi : et aliæ naves erant cum illo. **37** Et facta est procella magna venti, et fluctus mittebat in navim, ita ut impleretur navis. **38** Et erat ipse in puppi super cervical dormiens : et excitant eum, et dicunt illi : Magister, non ad te pertinet, quia perimus ? **39** Et exurgens comminatus est vento, et dixit mari : Tace, obmutesce. Et cessavit ventus : et facta est tranquillitas magna. **40** Et ait illis : Quid timidi estis ? necdum habetis fidem ? et timuerunt timore magno, et dicebant ad

**alterutrum : Quis, putas, est iste, quia et ventus et mare obediunt ei ?**

**Cap. 5** <sup>1</sup> Et venerunt trans fretum maris in regionem Gerasenorum. <sup>2</sup> Et exeunti ei de navi, statim occurrit de monumentis homo in spiritu immundo, <sup>3</sup> qui domicilium habebat in monumentis, et neque catenis jam quisquam poterat eum ligare : <sup>4</sup> quoniam sæpe compedibus et catenis vinctus, dirupisset catenas, et compedes comminisset, et nemo poterat eum domare : <sup>5</sup> et semper die ac nocte in monumentis, et in montibus erat, clamans, et concidens se lapidibus. <sup>6</sup> Videns autem Jesum a longe, cucurrit, et adoravit eum : <sup>7</sup> et clamans voce magna dixit : Quid mihi et tibi, Jesu Fili Dei altissimi ? adjuro te per Deum, ne me torqueas. <sup>8</sup> Dicebat enim illi : Exi spiritus immunde ab homine. <sup>9</sup> Et interrogabat eum : Quod tibi nomen est ? Et dicit ei : Legio mihi nomen est, quia multi sumus. <sup>10</sup> Et deprecabatur eum multum, ne se expelleret extra regionem. <sup>11</sup> Erat autem ibi circa montem grex porcorum magnus, pascens. <sup>12</sup> Et deprecabantur eum spiritus, dicentes : Mitte nos in porcos ut in eos introëamus. <sup>13</sup> Et concessit eis statim Jesus. Et exeuntes spiritus immundi introierunt in porcos : et magno impetu grex præcipitatus est in mare ad duo millia, et suffocati sunt in mari. <sup>14</sup> Qui autem pascebant eos, fugerunt, et nuntiaverunt in civitatem et in agros. Et egressi sunt videre quid esset factum : <sup>15</sup> et veniunt ad Jesum : et vident illum qui a dæmonio vexabatur, sedentem, vestitum, et sanæ mentis, et timuerunt. <sup>16</sup> Et narraverunt illis, qui viderant, qualiter factum esset ei qui dæmonium habuerat, et de porcis. <sup>17</sup> Et rogare cœperunt eum ut discederet de finibus eorum. <sup>18</sup> Cumque ascenderet navim, cœpit illum deprecari, qui a dæmonio vexatus fuerat, ut esset cum illo, <sup>19</sup> et non admisit eum, sed ait illi : Vade in domum tuam ad tuos, et annuntia illis quanta tibi Dominus fecerit, et misertus sit tui. <sup>20</sup> Et abiit, et cœpit prædicare in Decapoli, quanta sibi fecisset Jesus : et omnes mirabantur. <sup>21</sup> Et cum transcendisset Jesus in navi

rursum trans fretum, convenit turba multa ad eum, et erat circa mare.

**22** Et venit quidam de archisynagogis nomine Jairus, et videns eum procidit ad pedes ejus, **23** et deprecabatur eum multum, dicens : Quoniam filia mea in extremis est, veni, impone manum super eam, ut salva sit, et vivat. **24** Et abiit cum illo, et sequebatur eum turba multa, et comprimebant eum. **25** Et mulier, quæ erat in profluvio sanguinis annis duodecim, **26** et fuerat multa perpessa a compluribus medicis : et erogaverat omnia sua, nec quidquam profecerat, sed magis deterius habebat : **27** cum audisset de Jesu, venit in turba retro, et tetigit vestimentum ejus : **28** dicebat enim : Quia si vel vestimentum ejus tetigero, salva ero. **29** Et confestim siccatus est fons sanguinis ejus : et sensit corpore quia sanata esset a plaga. **30** Et statim Jesus in semetipso cognoscens virtutem quæ exierat de illo, conversus ad turbam, aiebat : Quis tetigit vestimenta mea ? **31** Et dicebant ei discipuli sui : Vides turbam comprimentem te, et dicis : Quis me tetigit ? **32** Et circumspiciebat videre eam, quæ hoc fecerat. **33** Mulier vero timens et tremens, sciens quod factum esset in se, venit et procidit ante eum, et dixit ei omnem veritatem. **34** Ille autem dixit ei : Filia, fides tua te salvam fecit : vade in pace, et esto sana a plaga tua. **35** Adhuc eo loquente, veniunt ab archisynagogo, dicentes : Quia filia tua mortua est : quid ultra vexas magistrum ? **36** Jesus autem audito verbo quod dicebatur, ait archisynagogo : Noli timere : tantummodo crede. **37** Et non admisit quemquam se sequi nisi Petrum, et Jacobum, et Joannem fratrem Jacobi. **38** Et veniunt in domum archisynagogi, et videt tumultum, et flentes, et ejulantes multum. **39** Et ingressus, ait illis : Quid turbamini, et ploratis ? puella non est mortua, sed dormit. **40** Et irridebant eum. Ipse vero ejectis omnibus assumit patrem, et matrem puellæ, et qui secum erant, et ingreditur ubi puella erat jacens. **41** Et tenens manum puellæ, ait illi : Talitha cumi, quod est interpretatum : Puella (tibi dico),

surge. <sup>42</sup> Et confestim surrexit puella, et ambulabat : erat autem annorum duodecim : et obstupuerunt stupore magno. <sup>43</sup> Et præcepit illis vehementer ut nemo id sciret : et dixit dari illi manducare.

**Cap. 6** <sup>1</sup> Et egressus inde, abiit in patriam suam : et sequebantur eum discipuli sui : <sup>2</sup> et facto sabbato cœpit in synagoga docere : et multi audientes admirabantur in doctrina ejus, dicentes : Unde huic hæc omnia ? et quæ est sapientia, quæ data est illi, et virtutes tales, quæ per manus ejus efficiuntur ? <sup>3</sup> Nonne hic est faber, filius Mariæ, frater Jacobi, et Joseph, et Judæ, et Simonis ? nonne et sorores ejus hic nobiscum sunt ? Et scandalizabantur in illo. <sup>4</sup> Et dicebat illis Jesus : Quia non est propheta sine honore nisi in patria sua, et in domo sua, et in cognatione sua. <sup>5</sup> Et non poterat ibi virtutem ullam facere, nisi paucos infirmos impositis manibus curavit : <sup>6</sup> et mirabatur propter incredulitatem eorum, et circuibat castella in circuitu docens.

<sup>7</sup> Et vocavit duodecim : et cœpit eos mittere binos, et dabat illis potestatem spirituum immundorum. <sup>8</sup> Et præcepit eis ne quid tollerent in via, nisi virgam tantum : non peram, non panem, neque in zona æs, <sup>9</sup> sed calceatos sandaliis, et ne induerentur duabus tunicis. <sup>10</sup> Et dicebat eis : Quocumque introieritis in domum, illic manete donec exeatis inde : <sup>11</sup> et quicumque non receperint vos, nec audierint vos, exeuntes inde, excutite pulverem de pedibus vestris in testimonium illis. <sup>12</sup> Et exeuntes prædicabant ut pœnitentiam agerent : <sup>13</sup> et dæmonia multa ejiciebant, et ungebant oleo multos ægros, et sanabant.

<sup>14</sup> Et audivit rex Herodes (manifestum enim factum est nomen ejus), et dicebat : Quia Joannes Baptista resurrexit a mortuis : et propterea virtutes operantur in illo. <sup>15</sup> Alii autem dicebant : Quia Elias est ; alii vero dicebant : Quia propheta est, quasi unus ex prophetis. <sup>16</sup> Quo audito

Herodes ait : Quem ego decollavi Joannem, hic a mortuis resurrexit. **17** Ipse enim Herodes misit, ac tenuit Joannem, et vinxit eum in carcere propter Herodiadem uxorem Philippi fratris sui, quia duxerat eam. **18** Dicebat enim Joannes Herodi : Non licet tibi habere uxorem fratris tui. **19** Herodias autem insidiabatur illi : et volebat occidere eum, nec poterat. **20** Herodes enim metuebat Joannem, sciens eum virum justum et sanctum : et custodiebat eum, et audito eo multa faciebat, et libenter eum audiebat. **21** Et cum dies opportunus accidisset, Herodes natalis sui cœnam fecit principibus, et tribunis, et primis Galilææ : **22** cumque introisset filia ipsius Herodiadis, et saltasset, et placuisset Herodi, simulque recumbentibus, rex ait puellæ : Pete a me quod vis, et dabo tibi : **23** et juravit illi : Quia quidquid petieris dabo tibi, licet dimidium regni mei. **24** Quæ cum exisset, dixit matri suæ : Quid petam ? At illa dixit : Caput Joannis Baptistæ. **25** Cumque introisset statim cum festinatione ad regem, petivit dicens : Volo ut protinus des mihi in disco caput Joannis Baptistæ. **26** Et contristatus est rex : propter jusjurandum, et propter simul discumbentes, noluit eam contristare : **27** sed misso speculatore præcepit afferri caput ejus in disco. Et decollavit eum in carcere, **28** et attulit caput ejus in disco : et dedit illud puellæ, et puella dedit matri suæ. **29** Quo audito, discipuli ejus venerunt, et tulerunt corpus ejus : et posuerunt illud in monumento.

**30** Et convenientes Apostoli ad Jesum, renuntiaverunt ei omnia quæ egerant, et docuerant. **31** Et ait illis : Venite seorsum in desertum locum, et requiescite pusillum. Erant enim qui veniebant et redibant multi : et nec spatium manducandi habebant. **32** Et ascendentes in navim, abierunt in desertum locum seorsum. **33** Et viderunt eos abeuntes, et cognoverunt multi : et pedestres de omnibus civitatibus concurrerunt illuc, et prævenerunt eos. **34** Et exiens vidit turbam multam Jesus : et misertus est super eos, quia erant sicut oves non habentes pastorem, et cœpit docere multa. **35** Et cum jam hora multa fieret,

accesserunt discipuli ejus, dicentes : Desertus est locus hic, et jam hora præteriit : **36** dimitte illos, ut euntes in proximas villas et vicos, emant sibi cibos, quos manducent. **37** Et respondens ait illis : Date illis vos manducare. Et dixerunt ei : Euntes emamus ducentis denariis panes, et dabimus illis manducare. **38** Et dicit eis : Quot panes habetis ? ite, et videte. Et cum cognovissent, dicunt : Quinque, et duos pisces. **39** Et præcepit illis ut accumbere facerent omnes secundum contubernia super viride fœnum. **40** Et discubuerunt in partes per centenos et quinquagenos. **41** Et acceptis quinque panibus et duobus piscibus, intuens in cœlum, benedixit, et fregit panes, et dedit discipulis suis, ut ponerent ante eos : et duos pisces divisit omnibus. **42** Et manducaverunt omnes, et saturati sunt. **43** Et sustulerunt reliquias, fragmentorum duodecim cophinos plenos, et de piscibus. **44** Erant autem qui manducaverunt quinque millia virorum.

**45** Et statim coëgit discipulos suos ascendere navim, ut præcederent eum trans fretum ad Bethsaidam, dum ipse dimitteret populum. **46** Et cum dimisisset eos, abiit in montem orare. **47** Et cum sero esset, erat navis in medio mari et ipse solus in terra. **48** Et videns eos laborantes in remigando (erat enim ventus contrarius eis) et circa quartam vigiliam noctis venit ad eos ambulans supra mare : et volebat præterire eos. **49** At illi ut viderunt eum ambulans supra mare, putaverunt phantasma esse, et exclamaverunt. **50** Omnes enim viderunt eum, et conturbati sunt. Et statim locutus est cum eis, et dixit eis : Confidite, ego sum : nolite timere. **51** Et ascendit ad illos in navim, et cessavit ventus. Et plus magis intra se stupebant : **52** non enim intellexerunt de panibus : erat enim cor eorum obcæcatum. **53** Et cum transfretassent, venerunt in terram Genesareth, et applicuerunt. **54** Cumque egressi essent de navi, continuo cognoverunt eum : **55** et percurrentes universam regionem illam, cœperunt in grabatis eos, qui se male habebant,

circumferre, ubi audiebant eum esse. <sup>56</sup> Et quocumque introibat, in vicos, vel in villas aut civitates, in plateis ponebant infirmos, et deprecabantur eum, ut vel fimbriam vestimenti ejus tangerent, et quotquot tangebant eum, salvi fiebant.

**Cap. 7** <sup>1</sup> Et conveniunt ad eum pharisæi, et quidam de scribis, venientes ab Jerosolymis. <sup>2</sup> Et cum vidissent quosdam ex discipulis ejus communibus manibus, id est non lotis, manducare panes, vituperaverunt. <sup>3</sup> Pharisæi enim, et omnes Judæi, nisi crebro laverint manus, non manducant, tenentes traditionem seniorum : <sup>4</sup> et a foro nisi baptizentur, non comedunt : et alia multa sunt, quæ tradita sunt illis servare, baptismata calicum, et urceorum, et æramentorum, et lectorum : <sup>5</sup> et interrogabant eum pharisæi et scribæ : Quare discipuli tui non ambulant juxta traditionem seniorum, sed communibus manibus manducant panem ? <sup>6</sup> At ille respondens, dixit eis : Bene prophetavit Isaias de vobis hypocritis, sicut scriptum est :  
**Populus hic labiis me honorat,  
 cor autem eorum longe est a me :  
<sup>7</sup> in vanum autem me colunt,  
 docentes doctrinas, et præcepta hominum.**  
<sup>8</sup> Relinquentes enim mandatum Dei, tenetis traditionem hominum, baptismata urceorum et calicum : et alia similia his facitis multa. <sup>9</sup> Et dicebat illis : Bene irritum facitis præceptum Dei, ut traditionem vestram servetis.  
<sup>10</sup> Moyses enim dixit : Honora patrem tuum, et matrem tuam. Et : Qui maledixerit patri, vel matri, morte moriatur.  
<sup>11</sup> Vos autem dicitis : Si dixerit homo patri, aut matri, Corban (quod est donum) quodcumque ex me, tibi profuerit : <sup>12</sup> et ultra non dimittitis eum quidquam facere patri suo, aut matri, <sup>13</sup> rescindentes verbum Dei per traditionem vestram, quam tradidistis : et similia hujusmodi multa facitis.

<sup>14</sup> Et advocans iterum turbam, dicebat illis : Audite me

omnes, et intelligite. **15** Nihil est extra hominem introiens in eum, quod possit eum coinquinare, sed quæ de homine procedunt illa sunt quæ communicant hominem. **16** Si quis habet aures audiendi, audiat. **17** Et cum introisset in domum a turba, interrogabant eum discipuli ejus parabolam. **18** Et ait illis : Sic et vos imprudentes estis ? Non intelligitis quia omne extrinsecus introiens in hominem, non potest eum communicare : **19** quia non intrat in cor ejus, sed in ventrum vadit, et in secessum exit, purgans omnes escas ? **20** Dicebat autem, quoniam quæ de homine exeunt, illa communicant hominem. **21** Ab intus enim de corde hominum malæ cogitationes procedunt, adulteria, fornicationes, homicidia, **22** furta, avaritiæ, nequitia, dolus, impudicitia, oculus malus, blasphemia, superbia, stultitia. **23** Omnia hæc mala ab intus procedunt, et communicant hominem.

**24** Et inde surgens abiit in fines Tyri et Sidonis : et ingressus domum, neminem voluit scire, et non potuit latere. **25** Mulier enim statim ut audivit de eo, cujus filia habebat spiritum immundum, intravit, et procidit ad pedes ejus. **26** Erat enim mulier gentilis, Syrophœnissa genere. Et rogabat eum ut dæmonium ejiceret de filia ejus. **27** Qui dixit illi : Sine prius saturari filios : non est enim bonum sumere panem filiorum, et mittere canibus. **28** At illa respondit, et dixit illi : Utique Domine, nam et catelli comedunt sub mensa de micis puerorum. **29** Et ait illi : Propter hunc sermonem vade : exiit dæmonium a filia tua. **30** Et cum abiisset domum suam, invenit puellam jacentem supra lectum, et dæmonium exiisse.

**31** Et iterum exiens de finibus Tyri, venit per Sidonem ad mare Galilææ inter medios fines Decapoleos. **32** Et adducunt ei surdum, et mutum, et deprecabantur eum, ut imponat illi manum. **33** Et apprehendens eum de turba seorsum, misit digitos suos in auriculas ejus : et exspuens, tetigit linguam ejus : **34** et suscipiens in cælum, ingemuit, et ait illi : Ephphetha, quod est, Adaperire. **35** Et statim

apertæ sunt aures ejus, et solutum est vinculum linguæ ejus, et loquebatur recte. <sup>36</sup> Et præcepit illis ne cui dicerent. Quanto autem eis præcipiebat, tanto magis plus prædicabant : <sup>37</sup> et eo amplius admirabantur, dicentes : Bene omnia fecit : et surdos fecit audire, et mutos loqui.

**Cap. 8** <sup>1</sup> In diebus illis iterum cum turba multa esset, nec haberent quod manducarent, convocatis discipulis, ait illis : <sup>2</sup> Misereor super turbam : quia ecce jam triduo sustinent me, nec habent quod manducent : <sup>3</sup> et si dimisero eos jejunos in domum suam, deficient in via : quidam enim ex eis de longe venerunt. <sup>4</sup> Et responderunt ei discipuli sui : Unde illos quis poterit saturare panibus in solitudine ? <sup>5</sup> Et interrogavit eos : Quot panes habetis ? Qui dixerunt : Septem. <sup>6</sup> Et præcepit turbæ discumbere super terram. Et accipiens septem panes, gratias agens fregit, et dabat discipulis suis ut apponerent, et apposuerunt turbæ. <sup>7</sup> Et habebant pisciculos paucos : et ipsos benedixit, et jussit apponi. <sup>8</sup> Et manducaverunt, et saturati sunt, et sustulerunt quod superaverat de fragmentis, septem sportas. <sup>9</sup> Erant autem qui manducaverunt, quasi quatuor millia : et dimisit eos.

<sup>10</sup> Et statim ascendens navim cum discipulis suis, venit in partes Dalmanutha. <sup>11</sup> Et exierunt pharisæi, et cœperunt conquirere cum eo, quærentes ab illo signum de cælo, tentantes eum. <sup>12</sup> Et ingemiscens spiritu, ait : Quid generatio ista signum quærit ? Amen dico vobis, si dabitur generationi isti signum. <sup>13</sup> Et dimittens eos, ascendit iterum navim et abiit trans fretum.

<sup>14</sup> Et obliti sunt panes sumere : et nisi unum panem non habebant secum in navi. <sup>15</sup> Et præcipiebat eis, dicens : Videte, et cavete a fermento pharisæorum, et fermento Herodis. <sup>16</sup> Et cogitabant ad alterutrum, dicentes : quia panes non habemus. <sup>17</sup> Quo cognito, ait illis Jesus : Quid cogitatis, quia panes non habetis ? nondum cognoscetis nec intelligitis ? adhuc cæcatum habetis cor vestrum ?

**18** oculos habentes non videtis ? et aures habentes non auditis ? nec recordamini, **19** quando quinque panes fregi in quinque millia : quot cophinos fragmentorum plenos sustulistis ? Dicunt ei : Duodecim. **20** Quando et septem panes in quatuor millia : quot sportas fragmentorum tulistis ? Et dicunt ei : Septem. **21** Et dicebat eis : Quomodo nondum intelligitis ?

**22** Et veniunt Bethsaidam, et adducunt ei cæcum, et rogabant eum ut illum tangeret. **23** Et apprehensa manu cæci, eduxit eum extra vicum : et exspuens in oculos ejus impositis manibus suis, interrogavit eum si quid videret. **24** Et aspiciens, ait : Video homines velut arbores ambulantes. **25** Deinde iterum imposuit manus super oculos ejus : et cœpit videre : et restitutus est ita ut clare videret omnia. **26** Et misit illum in domum suam, dicens : Vade in domum tuam : et si in vicum introieris, nemini dixeris.

**27** Et egressus est Jesus, et discipuli ejus in castella Cæsareæ Philippi : et in via interrogabat discipulos suos, dicens eis : Quem me dicunt esse homines ? **28** Qui responderunt illi, dicentes : Joannem Baptistam, alii Eliam, alii vero quasi unum de prophetis. **29** Tunc dicit illis : Vos vero quem me esse dicitis ? Respondens Petrus, ait ei : Tu es Christus. **30** Et comminatus est eis, ne cui dicerent de illo.

**31** Et cœpit docere eos quoniam oportet Filium hominis pati multa, et reprobari a senioribus, et a summis sacerdotibus et scribis, et occidi : et post tres dies resurgere. **32** Et palam verbum loquebatur. Et apprehendens eum Petrus, cœpit increpare eum. **33** Qui conversus, et videns discipulos suos, comminatus est Petro, dicens : Vade retro me Satana, quoniam non sapis quæ Dei sunt, sed quæ sunt hominum.

**34** Et convocata turba cum discipulis suis, dixit eis : Si quis

vult me sequi, deneget semetipsum : et tollat crucem suam, et sequatur me. **35** Qui enim voluerit animam suam salvam facere, perdet eam : qui autem perdiderit animam suam propter me, et Evangelium, salvam faciet eam. **36** Quid enim proderit homini, si lucretur mundum totum et detrimentum animæ suæ faciat ? **37** Aut quid dabit homo commutationis pro anima sua ? **38** Qui enim me confusus fuerit, et verba mea in generatione ista adultera et peccatrice, et Filius hominis confundetur eum, cum venerit in gloria Patris sui cum angelis sanctis. **39** Et dicebat illis : Amen dico vobis, quia sunt quidam de hic stantibus, qui non gustabunt mortem donec videant regnum Dei veniens in virtute.

**Cap. 9** **1** Et post dies sex assumit Jesus Petrum, et Jacobum, et Joannem, et ducit illos in montem excelsum seorsum solos, et transfiguratus est coram ipsis. **2** Et vestimenta ejus facta sunt splendentia, et candida nimis velut nix, qualia fullo non potest super terram candida facere. **3** Et apparuit illis Elias cum Moyse : et erant loquentes cum Jesu. **4** Et respondens Petrus, ait Jesu : Rabbi, bonum est nos hic esse : et faciamus tria tabernacula, tibi unum, et Moysi unum, et Eliæ unum. **5** Non enim sciebat quid diceret : erant enim timore exterriti. **6** Et facta est nubes obumbrans eos : et venit vox de nube, dicens : Hic est Filius meus carissimus : audite illum. **7** Et statim circumspicientes, neminem amplius viderunt, nisi Jesum tantum secum. **8** Et descendentes illis de monte, præcepit illis ne cuiquam quæ vidissent, narrarent : nisi cum Filius hominis a mortuis resurrexerit. **9** Et verbum continuerunt apud se : conquirerentes quid esset, cum a mortuis resurrexerit. **10** Et interrogabant eum, dicentes : Quid ergo dicunt pharisæi et scribæ, quia Eliam oportet venire primum ? **11** Qui respondens, ait illis : Elias cum venerit primo, restituet omnia : et quomodo scriptum est in Filium hominis, ut multa patiatur et contemnatur. **12** Sed dico vobis quia et Elias venit (et fecerunt illi quæcumque voluerunt) sicut scriptum est de

eo.

**13** Et veniens ad discipulos suos, vidit turbam magnam circa eos, et scribas conquirentes cum illis. **14** Et confestim omnis populus videns Jesum, stupefactus est, et expaverunt, et accurrentes salutabant eum. **15** Et interrogavit eos : Quid inter vos conquiritis ? **16** Et respondens unus de turba, dixit : Magister, attuli filium meum ad te habentem spiritum mutum : **17** qui ubicumque eum apprehenderit, allidit illum, et spumat, et stridet dentibus, et arescit : et dixi discipulis tuis ut ejicerent illum, et non potuerunt. **18** Qui respondens eis, dixit : O generatio incredula, quamdiu apud vos ero ? quamdiu vos patiar ? afferte illum ad me. **19** Et attulerunt eum. Et cum vidisset eum, statim spiritus conturbavit illum : et elisus in terram, volutabatur spumans. **20** Et interrogavit patrem ejus : Quantum temporis est ex quo ei hoc accidit ? At ille ait : Ab infantia : **21** et frequenter eum in ignem, et in aquas misit ut eum perderet : sed si quid potes, adjuva nos, misertus nostri. **22** Jesus autem ait illi : Si potes credere, omniaabilia sunt credenti. **23** Et continuo exclamans pater pueri, cum lacrimis aiebat : Credo, Domine ; adjuva incredulitatem meam. **24** Et cum videret Jesus concurrentem turbam, comminatus est spiritui immundo, dicens illi : Surde et mute spiritus, ego præcipio tibi, exi ab eo : et amplius ne introëas in eum. **25** Et exclamans, et multum discerpens eum, exiit ab eo, et factus est sicut mortuus, ita ut multi dicerent : Quia mortuus est. **26** Jesus autem tenens manum ejus elevavit eum, et surrexit. **27** Et cum introisset in domum, discipuli ejus secreto interrogabant eum : Quare nos non potuimus ejicere eum ? **28** Et dixit illis : Hoc genus in nullo potest exire, nisi in oratione et jejunio. **29** Et inde profecti prætergrediebantur Galilæam : nec volebat quemquam scire.

**30** Docebat autem discipulos suos, et dicebat illis : Quoniam Filius hominis tradetur in manus hominum, et

occident eum, et occisus tertia die resurget. <sup>31</sup> At illi ignorabant verbum : et timebant interrogare eum.

<sup>32</sup> Et venerunt Capharnaum. Qui cum domi essent, interrogabat eos : Quid in via tractabatis ? <sup>33</sup> At illi tacebant : siquidem in via inter se disputaverunt : quis eorum major esset. <sup>34</sup> Et residens vocavit duodecim, et ait illis : Si quis vult primus esse, erit omnium novissimus, et omnium minister. <sup>35</sup> Et accipiens puerum, statuit eum in medio eorum : quem cum complexus esset, ait illis : <sup>36</sup> Quisquis unum ex huiusmodi pueris receperit in nomine meo, me recipit : et quicumque me susceperit, non me suscipit, sed eum qui misit me.

<sup>37</sup> Respondit illi Joannes, dicens : Magister, vidimus quemdam in nomine tuo ejicientem dæmonia, qui non sequitur nos, et prohibuimus eum. <sup>38</sup> Jesus autem ait : Nolite prohibere eum : nemo est enim qui faciat virtutem in nomine meo, et possit cito male loqui de me : <sup>39</sup> qui enim non est adversum vos, pro vobis est. <sup>40</sup> Quisquis enim potum dederit vobis calicem aquæ in nomine meo, quia Christi estis : amen dico vobis, non perdet mercedem suam.

<sup>41</sup> Et quisquis scandalizaverit unum ex his pusillis credentibus in me : bonum est ei magis si circumdaretur mola asinaria collo ejus, et in mare mitteretur. <sup>42</sup> Et si scandalizaverit te manus tua, abscide illam : bonum est tibi debilem introire in vitam, quam duas manus habentem ire in gehennam, in ignem inextinguibilem, <sup>43</sup> ubi vermis eorum non moritur, et ignis non extinguitur. <sup>44</sup> Et si pes tuus te scandalizat, amputa illum : bonum est tibi claudum introire in vitam æternam, quam duos pedes habentem mitti in gehennam ignis inextinguibilis, <sup>45</sup> ubi vermis eorum non moritur, et ignis non extinguitur. <sup>46</sup> Quod si oculus tuus scandalizat te, ejice eum : bonum est tibi luscum introire in regnum Dei, quam duos oculos habentem mitti in gehennam ignis, <sup>47</sup> ubi vermis eorum

non moritur, et ignis non extinguitur. <sup>48</sup> Omnis enim igne salietur, et omnis victima sale salietur. <sup>49</sup> Bonum est sal : quod si sal insulsum fuerit, in quo illud condietis ? Habete in vobis sal, et pacem habete inter vos.

**Cap. 10** <sup>1</sup> Et inde exurgens venit in fines Judææ ultra Jordanem : et conveniunt iterum turbæ ad eum : et sicut consueverat, iterum docebat illos. <sup>2</sup> Et accedentes pharisæi interrogabant eum : Si licet vero uxorem dimittere : tentantes eum. <sup>3</sup> At ille respondens, dixit eis : Quid vobis præcepit Moyses ? <sup>4</sup> Qui dixerunt : Moyses permisit libellum repudii scribere, et dimittere. <sup>5</sup> Quibus respondens Jesus, ait : Ad duritiam cordis vestri scripsit vobis præceptum istud : <sup>6</sup> ab initio autem creaturæ masculum et feminam fecit eos Deus. <sup>7</sup> Propter hoc relinquet homo patrem suum et matrem, et adhærebit ad uxorem suam : <sup>8</sup> et erunt duo in carne una. Itaque jam non sunt duo, sed una caro. <sup>9</sup> Quod ergo Deus conjunxit, homo non separet. <sup>10</sup> Et in domo iterum discipuli ejus de eodem interrogaverunt eum. <sup>11</sup> Et ait illis : Quicumque dimiserit uxorem suam, et aliam duxerit, adulterium committit super eam. <sup>12</sup> Et si uxor dimiserit virum suum, et alii nupserit, mœchatur.

<sup>13</sup> Et offerebant illi parvulos ut tangeret illos. Discipuli autem comminabantur offerentibus. <sup>14</sup> Quos cum videret Jesus, indigne tulit, et ait illis : Sinite parvulos venire ad me, et ne prohibueritis eos : talium enim est regnum Dei. <sup>15</sup> Amen dico vobis : Quisquis non receperit regnum Dei velut parvulus, non intrabit in illud. <sup>16</sup> Et complexans eos, et imponens manus super illos, benedicebat eos.

<sup>17</sup> Et cum egressus esset in viam, procurrens quidam genu flexo ante eum, rogabat eum : Magister bone, quid faciam ut vitam æternam percipiam ? <sup>18</sup> Jesus autem dixit ei : Quid me dicis bonum ? nemo bonus, nisi unus Deus. <sup>19</sup> Præcepta nosti : ne adulteres, ne occidas, ne fureris, ne falsum testimonium dixeris, ne fraudum feceris, honora

patrem tuum et matrem. **20** At ille respondens, ait illi : Magister, hæc omnia observavi a juventute mea. **21** Jesus autem intuitus eum, dilexit eum, et dixit ei : Unum tibi deest : vade, quæcumque habes vende, et da pauperibus, et habebis thesaurum in cælo : et veni, sequere me.

**22** Qui contristatus in verbo, abiit mœrens : erat enim habens multas possessiones. **23** Et circumspiciens Jesus, ait discipulis suis : Quam difficile qui pecunias habent, in regnum Dei introibunt ! **24** Discipuli autem obstupescabant in verbis ejus. At Jesus rursus respondens ait illis : Filioli, quam difficile est, confidentes in pecuniis, in regnum Dei introire ! **25** Facilius est camelum per foramen acus transire, quam divitem intrare in regnum Dei. **26** Qui magis admirabantur, dicentes ad semetipsos : Et quis potest salvus fieri ? **27** Et intuens illos Jesus, ait : Apud homines impossibile est, sed non apud Deum : omnia enim possible sunt apud Deum.

**28** Et cœpit ei Petrus dicere : Ecce nos dimisimus omnia, et secuti sumus te. **29** Respondens Jesus, ait : Amen dico vobis : Nemo est qui reliquerit domum, aut fratres, aut sorores, aut patrem, aut matrem, aut filios, aut agros propter me et propter Evangelium, **30** qui non accipiat centies tantum, nunc in tempore hoc : domos, et fratres, et sorores, et matres, et filios, et agros, cum persecutionibus, et in sæculo futuro vitam æternam.

**31** Multi autem erunt primi novissimi, et novissimi primi.

**32** Erant autem in via ascendentes Jerosolymam : et præcedebat illos Jesus, et stupebant : et sequentes timebant. Et assumens iterum duodecim, cœpit illis dicere quæ essent ei eventura. **33** Quia ecce ascendimus Jerosolymam, et Filius hominis tradetur principibus sacerdotum, et scribis, et senioribus, et damnabunt eum morte, et tradent eum gentibus : **34** et illudent ei, et conspuent eum, et flagellabunt eum, et interficient eum : et tertia die resurget.

**35** Et accedunt ad eum Jacobus et Joannes filii Zebedæi, dicentes : Magister, volumus ut quodcumque petierimus, facias nobis. **36** At ille dixit eis : Quid vultis ut faciam vobis ? **37** Et dixerunt : Da nobis ut unus ad dexteram tuam, et alius ad sinistram tuam sedeamus in gloria tua. **38** Jesus autem ait eis : Nescitis quid petatis : potestis bibere calicem, quem ego bibo, aut baptismo, quo ego baptizor, baptizari ? **39** At illi dixerunt ei : Possumus. Jesus autem ait eis : Calicem quidem, quem ego bibo, bibetis ; et baptismo, quo ego baptizor, baptizabimini : **40** sedere autem ad dexteram meam, vel ad sinistram, non est meum dare vobis, sed quibus paratum est. **41** Et audientes decem, cœperunt indignari de Jacobo et Joanne. **42** Jesus autem vocans eos, ait illis : Scitis quia hi, qui videntur principari gentibus, dominantur eis : et principes eorum potestatem habent ipsorum. **43** Non ita est autem in vobis, sed quicumque voluerit fieri major, erit vester minister : **44** et quicumque voluerit in vobis primus esse, erit omnium servus. **45** Nam et Filius hominis non venit ut ministraretur ei, sed ut ministraret, et daret animam suam redemptionem pro multis.

**46** Et veniunt Jericho : et proficiscente eo de Jericho, et discipulis ejus, et plurima multitudine, filius Timæi Bartimæus cæcus, sedebat juxta viam mendicans. **47** Qui cum audisset quia Jesus Nazareus est, cœpit clamare, et dicere : Jesu fili David, miserere mei. **48** Et comminabantur ei multi ut taceret. At ille multo magis clamabat : Fili David, miserere mei. **49** Et stans Jesus præcepit illum vocari. Et vocant cæcum, dicentes ei : Animæquior esto : surge, vocat te. **50** Qui projecto vestimento suo exiliens, venit ad eum. **51** Et respondens Jesus dixit illi : Quid tibi vis faciam ? Cæcus autem dixit ei : Rabboni, ut videam. **52** Jesus autem ait illi : Vade, fides tua te salvum fecit. Et confestim vidit, et sequebatur eum in via.

**Cap. 11** **1** Et cum appropinquarent Jerosolymæ et Bethaniæ ad montem Olivarum, mittit duos ex discipulis

suis, <sup>2</sup> et ait illis : Ite in castellum, quod contra vos est, et statim introentes illuc, invenietis pullum ligatum, super quem nemo adhuc hominum sedit : solvite illum, et adducite. <sup>3</sup> Et si quis vobis dixerit : Quid facitis ? dicite, quia Domino necessarius est : et continuo illum dimittet huc. <sup>4</sup> Et abeuntes invenerunt pullum ligatum ante januam foris in bivio : et solvunt eum. <sup>5</sup> Et quidam de illic stantibus dicebant illis : Quid facitis solventes pullum ? <sup>6</sup> Qui dixerunt eis sicut praeceperat illis Jesus, et dimiserunt eis. <sup>7</sup> Et duxerunt pullum ad Jesum : et imponunt illi vestimenta sua, et sedit super eum. <sup>8</sup> Multi autem vestimenta sua straverunt in via : alii autem frondes caedebant de arboribus, et sternebant in via. <sup>9</sup> Et qui praebant, et qui sequebantur, clamabant, dicentes : Hosanna : benedictus qui venit in nomine Domini : <sup>10</sup> benedictum quod venit regnum patris nostri David : hosanna in excelsis. <sup>11</sup> Et introivit Jerosolymam in templum : et circumspexit omnibus, cum jam vespera esset hora, exiit in Bethaniam cum duodecim.

<sup>12</sup> Et alia die cum exirent a Bethania, esuriit. <sup>13</sup> Cumque vidisset a longe ficum habentem folia, venit si quid forte inveniret in ea : et cum venisset ad eam, nihil invenit praeter folia : non enim erat tempus ficorum. <sup>14</sup> Et respondens dixit ei : Jam non amplius in aeternum ex te fructum quisquam manducet. Et audiebant discipuli ejus.

<sup>15</sup> Et veniunt in Jerosolymam. Et cum introisset in templum, cepit ejicere vendentes et ementes in templo : et mensas numulariorum, et cathedras vendentium columbas evertit : <sup>16</sup> et non sinebat ut quisquam transferret vas per templum : <sup>17</sup> et docebat, dicens eis : Nonne scriptum est : Quia domus mea, domus orationis vocabitur omnibus gentibus ? vos autem fecistis eam speluncam latronum. <sup>18</sup> Quo audito principes sacerdotum et scribae, quaerebant quomodo eum perderent : timebant enim eum, quoniam universa turba admirabatur super doctrina ejus. <sup>19</sup> Et cum vespera facta esset, egrediebatur de civitate.

**20** Et cum mane transirent, viderunt ficum aridam factam a radicibus. **21** Et recordatus Petrus, dixit ei : Rabbi, ecce ficus, cui maledixisti, aruit. **22** Et respondens Jesus ait illis : Habete fidem Dei. **23** Amen dico vobis, quia quicumque dixerit huic monti : Tollere, et mittere in mare, et non hæsiterit in corde suo, sed crediderit, quia quodcumque dixerit fiat, fiat ei. **24** Propterea dico vobis, omnia quaecumque orantes petitis, credite quia accipietis, et evenient vobis. **25** Et cum stabitis ad orandum, dimittite si quis habetis adversus aliquem : ut et Pater vester, qui in cælis est, dimittat vobis peccata vestra. **26** Quod si vos non dimiseritis : nec Pater vester, qui in cælis est, dimittet vobis peccata vestra.

**27** Et veniunt rursus Jerosolymam. Et cum ambularet in templo, accedunt ad eum summi sacerdotes, et scribæ, et seniores : **28** et dicunt ei : In qua potestate hæc facis ? et quis dedit tibi hanc potestatem ut ista facias ? **29** Jesus autem respondens, ait illis : Interrogabo vos et ego unum verbum, et respondete mihi : et dicam vobis in qua potestate hæc faciam. **30** Baptismus Joannis, de cælo erat, an ex hominibus ? Respondete mihi. **31** At illi cogitabant secum, dicentes : Si dixerimus : De cælo, dicet : Quare non credidistis ei ? **32** Si dixerimus : Ex hominibus, timemus populum : omnes enim habebant Joannem quia vere propheta esset. **33** Et respondentes dicunt Jesu : Nescimus. Et respondens Jesus ait illis : Neque ego dico vobis in qua potestate hæc faciam.

**Cap. 12** **1** Et cœpit illis in parabolis loqui : Vineam pastinavit homo, et circumdedit sepem, et fodit lacum, et ædificavit turrim, et locavit eam agricolis, et peregre profectus est. **2** Et misit ad agricolas in tempore servum ut ab agricolis acciperet de fructu vineæ. **3** Qui apprehensum eum ceciderunt, et dimiserunt vacuum. **4** Et iterum misit ad illos alium servum : et illum in capite vulneraverunt, et contumeliis affecerunt. **5** Et rursum alium

misit, et illum occiderunt : et plures alios : quosdam cædentes, alios vero occidentes. <sup>6</sup> Adhuc ergo unum habens filium carissimum, et illum misit ad eos novissimum, dicens : Quia reverebuntur filium meum. <sup>7</sup> Coloni autem dixerunt ad invicem : Hic est hæres : venite, occidamus eum : et nostra erit hæreditas. <sup>8</sup> Et apprehendentes eum, occiderunt : et ejecerunt extra vineam. <sup>9</sup> Quid ergo faciet dominus vineæ ? Veniet, et perdet colonos, et dabit vineam aliis. <sup>10</sup> Nec scripturam hanc legistis : Lapidem quem reprobaverunt ædificantes, hic factus est in caput anguli : <sup>11</sup> a Domino factum est istud, et est mirabile in oculis nostris ? <sup>12</sup> Et quærebant eum tenere : et timuerunt turbam : cognoverunt enim quoniam ad eos parabolam hanc dixerit. Et relicto eo abierunt.

<sup>13</sup> Et mittunt ad eum quosdam ex pharisæis, et herodianis, ut eum caperent in verbo. <sup>14</sup> Qui venientes dicunt ei : Magister, scimus quia verax es, et non curas quemquam : nec enim vides in faciem hominum, sed in veritate viam Dei doces. Licet dari tributum Cæsari, an non dabimus ? <sup>15</sup> Qui sciens versutiam illorum, ait illos : Quid me tentatis ? afferte mihi denarium ut videam. <sup>16</sup> At illi attulerunt ei. Et ait illis : Cujus est imago hæc, et inscriptio ? Dicunt ei : Cæsaris. <sup>17</sup> Respondens autem Jesus dixit illis : Reddite igitur quæ sunt Cæsaris, Cæsari : et quæ sunt Dei, Deo. Et mirabantur super eo.

<sup>18</sup> Et venerunt ad eum sadducæi, qui dicunt resurrectionem non esse : et interrogabant eum, dicentes : <sup>19</sup> Magister, Moyses nobis scripsit, ut si cujus frater mortuus fuerit, et dimiserit uxorem, et filios non reliquerit, accipiat frater ejus uxorem ipsius, et resuscitet semen fratri suo. <sup>20</sup> Septem ergo fratres erant : et primus accepit uxorem, et mortuus est non relicto semine. <sup>21</sup> Et secundus accepit eam, et mortuus est : et nec iste reliquit semen. Et tertius similiter. <sup>22</sup> Et acceperunt eam similiter septem : et non reliquerunt semen. Novissima omnium

defuncta est et mulier. **23** In resurrectione ergo cum resurrexerint, cujus de his erit uxor ? septem enim habuerunt eam uxorem. **24** Et respondens Jesus, ait illis : Nonne ideo erratis, non scientes Scripturas, neque virtutem Dei ? **25** Cum enim a mortuis resurrexerint, neque nubent, neque nubentur, sed sunt sicut angeli in cœlis. **26** De mortuis autem quod resurgant, non legistis in libro Moysi, super rubum, quomodo dixerit illi Deus, inquam : Ego sum Deus Abraham, et Deus Isaac, et Deus Jacob ? **27** Non est Deus mortuorum, sed vivorum. Vos ergo multum erratis.

**28** Et accessit unus de scribis, qui audierat illos conquirentes, et videns quoniam bene illis responderit, interrogavit eum quod esset primum omnium mandatum. **29** Jesus autem respondit ei : Quia primum omnium mandatum est : Audi Israël, Dominus Deus tuus, Deus unus est : **30** et diliges Dominum Deum tuum ex tota corde tuo, et ex tota anima tua, et ex tota mente tua, et ex tota virtute tua. Hoc est primum mandatum. **31** Secundum autem simile est illi : Diliges proximum tuum tamquam teipsum. Majus horum aliud mandatum non est. **32** Et ait illi scriba : Bene, Magister, in veritate dixisti, quia unus est Deus, et non est alius præter eum. **33** Et ut diligatur ex toto corde, et ex toto intellectu, et ex tota anima, et ex tota fortitudine, et diligere proximum tamquam seipsum, majus est omnibus holocaustibus, et sacrificiis. **34** Jesus autem videns quod sapienter respondisset, dixit illi : Non es longe a regno Dei. Et nemo jam audebat eum interrogare.

**35** Et respondens Jesus dicebat, docens in templo : Quomodo dicunt scribæ Christum filium esse David ? **36** Ipse enim David dicit in Spiritu Sancto : Dixit Dominus Domino meo : Sede a dextris meis, donec ponam inimicos tuos scabellum pedum tuorum. **37** Ipse ergo David dicit eum Dominum, et unde est filius ejus ? Et multa turba eum libenter audivit. **38** Et dicebat eis in doctrina sua : Cavete

a scribis, qui volunt in stolis ambulare, et salutari in foro, **39** et in primis cathedris sedere in synagogis, et primos discubitus in cœnis : **40** qui devorant domos viduarum sub obtentu prolixæ orationis : hi accipient prolixius iudicium.

**41** Et sedens Jesus contra gazophylacium, aspiciebat quomodo turba jactaret æs in gazophylacium, et multi divites jactabant multa. **42** Cum venisset autem vidua una pauper, misit duo minuta, quod est quadrans, **43** et convocans discipulos suos, ait illis : Amen dico vobis, quoniam vidua hæc pauper plus omnibus misit, qui miserunt in gazophylacium. **44** Omnes enim ex eo, quod abundabat illis, miserunt : hæc vero de penuria sua omnia quæ habuit misit totum victum suum.

**Cap. 13** **1** Et cum egrederetur de templo, ait illi unus ex discipulis suis : Magister, aspice quales lapides, et quales structuræ. **2** Et respondens Jesus, ait illi : Vides has omnes magnas ædificationes ? Non relinquetur lapis super lapidem, qui non destruat.

**3** Et cum sederet in monte Olivarum contra templum, interrogabant eum separatim Petrus, et Jacobus, et Joannes, et Andreas : **4** Dic nobis, quando ista fient ? et quod signum erit, quando hæc omnia incipient consummari ? **5** Et respondens Jesus cœpit dicere illis : Videte ne quid vos seducat : **6** multi enim venient in nomine meo, dicentes quia ego sum : et multos seducent. **7** Cum audieritis autem bella, et opiniones bellorum, ne timueritis : oportet enim hæc fieri : sed nondum finis. **8** Exsurget enim gens contra gentem, et regnum super regnum, et erunt terræmotus per loca, et fames. Initium dolorum hæc.

**9** Videte autem vosmetipsos. Tradent enim vos in consiliis, et in synagogis vapulabitis, et ante præsides et reges stabitis propter me, in testimonium illis. **10** Et in omnes gentes primum oportet prædicari Evangelium. **11** Et cum

duxerint vos tradentes, nolite præcogitare quid loquamini : sed quod datum vobis fuerit in illa hora, id loquimini : non enim vos estis loquentes, sed Spiritus Sanctus. **12** Tradet autem frater fratrem in mortem, et pater filium : et consurgent filii in parentes, et morte afficient eos. **13** Et eritis odio omnibus propter nomen meum. Qui autem sustinuerit in finem, hic salvus erit.

**14** Cum autem videritis abominationem desolationis stantem, ubi non debet, qui legit, intelligat : tunc qui in Judæa sunt, fugiant in montes : **15** et qui super tectum, ne descendat in domum, nec introëat ut tollat quid de domo sua : **16** et qui in agro erit, non revertatur retro tollere vestimentum suum. **17** Væ autem prægnantibus et nutrientibus in illis diebus.

**18** Orate vero ut hieme non fiant. **19** Erunt enim dies illi tribulationes tales quales non fuerunt ab initio creaturæ, quam condidit Deus usque nunc, neque fient. **20** Et nisi breviasset Dominus dies, non fuisset salva omnis caro : sed propter electos, quos elegit, breviavit dies. **21** Et tunc si quis vobis dixerit : Ecce hic est Christus, ecce illic, ne credideritis. **22** Exsurgent enim pseudochristi et pseudoprophetæ, et dabunt signa et portenta ad seducendos, si fieri potest, etiam electos. **23** Vos ergo videte : ecce prædixi vobis omnia.

**24** Sed in illis diebus, post tribulationem illam, sol contenebrabitur, et luna non dabit splendorem suum : **25** et stellæ cæli erunt decidentes, et virtutes, quæ in cælis sunt, movebuntur. **26** Et tunc videbunt Filium hominis venientem in nubibus cum virtute multa et gloria. **27** Et tunc mittet angelos suos, et congregabit electos suos a quatuor ventis, a summo terræ usque ad summum cæli.

**28** A ficu autem discite parabolam. Cum jam ramus ejus tener fuerit, et nata fuerint folia, cognoscitis quia in proximo sit æstas : **29** sic et vos cum videritis hæc fieri,

scitote quod in proximo sit, in ostiis. **30** Amen dico vobis, quoniam non transibit generatio hæc, donec omnia ista fiant. **31** Cælum et terra transibunt, verba autem mea non transibunt.

**32** De die autem illo vel hora nemo scit, neque angeli in cælo, neque Filius, nisi Pater. **33** Videte, vigilate, et orate : nescitis enim quando tempus sit. **34** Sicut homo qui peregre profectus reliquit domum suam, et dedit servis suis potestatem cujusque operis, et janitori præcepit ut vigilet, **35** vigilate ergo (nescitis enim quando dominus domus veniat : sero, an media nocte, an galli cantu, an mane), **36** ne, cum venerit repente, inveniat vos dormientes. **37** Quod autem vobis dico, omnibus dico : Vigilare.

**Cap. 14** **1** Erat autem Pascha et azyma post biduum : et quærebant summi sacerdotes et scribæ quomodo eum dolo tenerent, et occiderent. **2** Dicebant autem : Non in die festo, ne forte tumultus fieret in populo.

**3** Et cum esset Bethaniæ in domo Simonis leprosi, et recumberet, venit mulier habens alabastrum unguenti nardi spicati pretiosi : et fracto alabastro, effudit super caput ejus. **4** Erant autem quidam indigne ferentes intra semetipsos, et dicentes : Ut quid perditio ista unguenti facta est ? **5** poterat enim unguentum istud venundari plus quam trecentis denariis, et dari pauperibus. Et fremebant in eam. **6** Jesus autem dixit : Sinite eam, quid illi molesti estis ? Bonum opus operata est in me : **7** semper enim pauperes habetis vobiscum : et cum volueritis, potestis illis benefacere : me autem non semper habetis. **8** Quod habuit hæc, fecit : prævenit ungere corpus meum in sepulturam. **9** Amen dico vobis : Ubiicumque prædicatum fuerit Evangelium istud in universo mundo, et quod fecit hæc, narrabitur in memoriam ejus.

**10** Et Judas Iscariotes, unus de duodecim, abiit ad summos

sacerdotes, ut proderet eum illis. **11** Qui audientes gavisissimi sunt : et promiserunt ei pecuniam se daturos. Et quærebat quomodo illum opportune traderet.

**12** Et primo die azymorum quando Pascha immolabant, dicunt ei discipuli : Quo vis eamus, et paremus tibi ut manduces Pascha ? **13** Et mittit duos ex discipulis suis, et dicit eis : Ite in civitatem, et occurret vobis homo lagenam aquæ bajulans : sequimini eum, **14** et quocumque introierit, dicite domino domus, quia magister dicit : Ubi est refectio mea, ubi Pascha cum discipulis meis manducem ? **15** Et ipse vobis demonstrabit cœnaculum grande, stratum : et illic parate nobis. **16** Et abierunt discipuli ejus, et venerunt in civitatem : et invenerunt sicut dixerat illis, et paraverunt Pascha. **17** Vespere autem facto, venit cum duodecim. **18** Et discumbentibus eis, et manducantibus, ait Jesus : Amen dico vobis, quia unus ex vobis tradet me, qui manducat mecum. **19** At illi cœperunt contristari, et dicere ei singulatim : Numquid ego ? **20** Qui ait illis : Unus ex duodecim, qui intingit mecum manum in catino. **21** Et Filius quidem hominis vadit sicut scriptum est de eo : vae autem homini illi per quem Filius hominis tradetur ! bonum erat ei, si non esset natus homo ille.

**22** Et manducantibus illis, accepit Jesus panem : et benedicens fregit, et dedit eis, et ait : Sumite, hoc est corpus meum. **23** Et accepto calice, gratias agens dedit eis : et biberunt ex illo omnes. **24** Et ait illis : Hic est sanguis meus novi testamenti, qui pro multis effundetur. **25** Amen dico vobis, quia jam non bibam de hoc genimine vitis usque in diem illum, cum illud bibam novum in regno Dei.

**26** Et hymno dicto exierunt in montem Olivarum. **27** Et ait eis Jesus : Omnes scandalizabimini in me in nocte ista : quia scriptum est : Percutiam pastorem, et dispergentur oves. **28** Sed postquam resurrexero, præcedam vos in Galilæam. **29** Petrus autem ait illi : Et si omnes

scandalizati fuerint in te, sed non ego. <sup>30</sup> Et ait illi Jesus : Amen dico tibi, quia tu hodie in nocte hac, priusquam gallus vocem bis dederit, ter me es negaturus. <sup>31</sup> At ille amplius loquebatur : Et si oportuerit me simul commori tibi, non te negabo. Similiter autem et omnes dicebant.

<sup>32</sup> Et veniunt in prædium, cui nomen Gethsemani. Et ait discipulis suis : Sedete hic donec orem. <sup>33</sup> Et assumit Petrum, et Jacobum, et Joannem secum : et cœpit pavere et tædere. <sup>34</sup> Et ait illis : Tristis est anima mea usque ad mortem : sustinete hic, et vigilate. <sup>35</sup> Et cum processisset paululum, procidit super terram, et orabat ut, si fieri posset, transiret ab eo hora. <sup>36</sup> Et dixit : Abba pater, omnia tibi possibile sunt : transfer calicem hunc a me : sed non quod ego volo, sed quod tu. <sup>37</sup> Et venit, et invenit eos dormientes. Et ait Petro : Simon, dormis ? non potuisti una hora vigilare ? <sup>38</sup> vigilate et orate, ut non intretis in tentationem. Spiritus quidem promptus est, caro vero infirma. <sup>39</sup> Et iterum abiens oravit, eundem sermonem dicens. <sup>40</sup> Et reversus, denuo invenit eos dormientes (erant enim oculi eorum gravati), et ignorabant quid responderent ei. <sup>41</sup> Et venit tertio, et ait illis : Dormite jam, et requiescite. Sufficit : venit hora : ecce Filius hominis tradetur in manus peccatorum. <sup>42</sup> Surgite, eamus : ecce qui me tradet, prope est.

<sup>43</sup> Et, adhuc eo loquente, venit Judas Iscariotes unus de duodecim, et cum eo turba multa cum gladiis et lignis, a summis sacerdotibus, et scribis, et senioribus. <sup>44</sup> Dederat autem traditor ejus signum eis, dicens : Quemcumque osculatus fuero, ipse est, tenete eum, et ducite caute. <sup>45</sup> Et cum venisset, statim accedens ad eum, ait : Ave Rabbi : et osculatus est eum. <sup>46</sup> At illi manus injecerunt in eum, et tenuerunt eum. <sup>47</sup> Unus autem quidam de circumstantibus educens gladium, percussit servum summi sacerdotis, et amputavit illi auriculam. <sup>48</sup> Et respondens Jesus, ait illis : Tamquam ad latronem existis cum gladiis et lignis comprehendere me ? <sup>49</sup> quotidie

eram apud vos in templo docens, et non me tenuistis. Sed ut impleantur Scripturæ. <sup>50</sup> Tunc discipuli ejus relinquentes eum, omnes fugerunt. <sup>51</sup> Adolescens autem quidam sequebatur eum amictus sindone super nudo : et tenuerunt eum. <sup>52</sup> At ille rejecta sindone, nudus profugit ab eis.

<sup>53</sup> Et adduxerunt Jesum ad summum sacerdotem : et convenerunt omnes sacerdotes, et scribæ, et seniores. <sup>54</sup> Petrus autem a longe secutus est eum usque intro in atrium summi sacerdotis : et sedebat cum ministris ad ignem, et calefaciebat se. <sup>55</sup> Summi vero sacerdotes et omne concilium quærebant adversus Jesum testimonium ut eum morti traderent : nec inveniebant. <sup>56</sup> Multi enim testimonium falsum dicebant adversus eum : et convenientia testimonia non erant. <sup>57</sup> Et quidam surgentes, falsum testimonium ferebant adversus eum, dicentes : <sup>58</sup> Quoniam nos audivimus eum dicentem : Ego dissolvam templum hoc manu factum, et per triduum aliud non manu factum ædificabo. <sup>59</sup> Et non erat conveniens testimonium illorum. <sup>60</sup> Et exurgens summus sacerdos in medium, interrogavit Jesum, dicens : Non respondes quidquam ad ea quæ tibi objiciuntur ab his ? <sup>61</sup> Ille autem tacebat, et nihil respondit. Rursum summus sacerdos interrogabat eum, et dixit ei : Tu es Christus Filius Dei benedicti ? <sup>62</sup> Jesus autem dixit illi : Ego sum : et videbitis Filium hominis sedentem a dextris virtutis Dei, et venientem cum nubibus cæli. <sup>63</sup> Summus autem sacerdos scindens vestimenta sua, ait : Quid adhuc desideramus testes ? <sup>64</sup> Audistis blasphemiam : quid vobis videtur ? Qui omnes condemnaverunt eum esse reum mortis. <sup>65</sup> Et cœperunt quidam conspuere eum, et velare faciem ejus, et colaphis eum cædere, et dicere ei : Prophetiza : et ministri alapis eum cædebant.

<sup>66</sup> Et cum esset Petrus in atrio deorsum, venit una ex ancillis summi sacerdotis : <sup>67</sup> et cum vidisset Petrum calefacientem se, aspiciens illum, ait : Et tu cum Jesu

Nazareno eras. <sup>68</sup> At ille negavit, dicens : Neque scio, neque novi quid dicas. Et exiit foras ante atrium, et gallus cantavit. <sup>69</sup> Rursus autem cum vidisset illum ancilla, cœpit dicere circumstantibus : Quia hic ex illis est. <sup>70</sup> At ille iterum negavit. Et post pusillum rursus qui astabant, dicebant Petro : Vere ex illis es : nam et Galilæus es. <sup>71</sup> Ille autem cœpit anathematizare et jurare : Quia nescio hominem istum, quem dicitis. <sup>72</sup> Et statim gallus iterum cantavit. Et recordatus est Petrus verbi quod dixerat ei Jesus : Priusquam gallus cantet bis, ter me negabis. Et cœpit flere.

**Cap. 15** <sup>1</sup> Et confestim mane consilium facientes summi sacerdotes cum senioribus, et scribis, et universo concilio, vincientes Jesum, duxerunt, et tradiderunt Pilato. <sup>2</sup> Et interrogavit eum Pilatus : Tu es rex Judæorum ? At ille respondens, ait illi : Tu dicis. <sup>3</sup> Et accusabant eum summi sacerdotes in multis. <sup>4</sup> Pilatus autem rursum interrogavit eum, dicens : Non respondes quidquam ? vide in quantis te accusant. <sup>5</sup> Jesus autem amplius nihil respondit, ita ut miraretur Pilatus. <sup>6</sup> Per diem autem festum solebat dimittere illis unum ex vinctis, quemcumque petissent. <sup>7</sup> Erat autem qui dicebatur Barrabas, qui cum seditiosis erat vinctus, qui in seditione fecerat homicidium. <sup>8</sup> Et cum ascendisset turba, cœpit rogare, sicut semper faciebat illis. <sup>9</sup> Pilatus autem respondit eis, et dixit : Vultis dimittam vobis regem Judæorum ? <sup>10</sup> Sciebat enim quod per invidiam tradidissent eum summi sacerdotes. <sup>11</sup> Pontifices autem concitaverunt turbam, ut magis Barabbam dimitteret eis. <sup>12</sup> Pilatus autem iterum respondens, ait illis : Quid ergo vultis faciam regi Judæorum ? <sup>13</sup> At illi iterum clamaverunt : Crucifige eum. <sup>14</sup> Pilatus vero dicebat illis : Quid enim mali fecit ? At illi magis clamabant : Crucifige eum. <sup>15</sup> Pilatus autem volens populo satisfacere, dimisit illis Barabbam, et tradidit Jesum flagellis cæsum, ut crucifigeretur.

<sup>16</sup> Milites autem duxerunt eum in atrium prætorii, et

convocant totam cohortem, <sup>17</sup> et induunt eum purpura, et imponunt ei plectentes spineam coronam. <sup>18</sup> Et cœperunt salutare eum : Ave rex Judæorum. <sup>19</sup> Et percutiebant caput ejus arundine : et conspuebant eum, et ponentes genua, adorabant eum. <sup>20</sup> Et postquam illuserunt ei, exuerunt illum purpura, et induerunt eum vestimentis suis : et educunt illum ut crucifigerent eum.

<sup>21</sup> Et angariaverunt prætereuntem quempiam, Simonem Cyrenæum venientem de villa, patrem Alexandri et Rufi, ut tolleret crucem ejus. <sup>22</sup> Et perducunt illum in Golgotha locum : quod est interpretatum Calvariæ locus. <sup>23</sup> Et dabant ei bibere myrrhatum vinum : et non accepit. <sup>24</sup> Et crucifigentes eum, diviserunt vestimenta ejus, mittentes sortem super eis, quis quid tolleret. <sup>25</sup> Erat autem hora tertia : et crucifixerunt eum. <sup>26</sup> Et erat titulus causæ ejus inscriptus : Rex Judæorum. <sup>27</sup> Et cum eo crucifigunt duos latrones : unum a dextris, et alium a sinistris ejus. <sup>28</sup> Et impleta est Scriptura, quæ dicit : Et cum iniquis reputatus est. <sup>29</sup> Et prætereuntes blasphemabant eum, moventes capita sua, et dicentes : Vah ! qui destruis templum Dei, et in tribus diebus reædificas, <sup>30</sup> salvum fac te ipsum descendens de cruce. <sup>31</sup> Similiter et summi sacerdotes illudentes, ad alterutrum cum scribis dicebant : Alios salvos fecit ; seipsum non potest salvum facere. <sup>32</sup> Christus rex Israël descendat nunc de cruce, ut videamus, et credamus. Et qui cum eo crucifixi erant, convitiabantur ei.

<sup>33</sup> Et facta hora sexta, tenebræ factæ sunt per totam terram usque in horam nonam. <sup>34</sup> Et hora nona exclamavit Jesus voce magna, dicens : Eloi, eloi, lamma sabachthani ? quod est interpretatum : Deus meus, Deus meus, ut quid dereliquisti me ? <sup>35</sup> Et quidam de circumstantibus audientes, dicebant : Ecce Eliam vocat. <sup>36</sup> Currens autem unus, et implens spongiam aceto, circumponensque calamo, potum dabat ei, dicens : Sinite, videamus si veniat Elias ad deponendum eum. <sup>37</sup> Jesus autem emissa

voce magna expiravit.

**38** Et velum templi scissum est in duo, a summo usque deorsum. **39** Videns autem centurio, qui ex adverso stabat, quia sic clamans expirasset, ait : Vere hic homo Filius Dei erat.

**40** Erant autem et mulieres de longe aspicientes : inter quas erat Maria Magdalene, et Maria Jacobi minoris, et Joseph mater, et Salome : **41** et cum esset in Galilæa, sequebantur eum, et ministrabant ei, et aliæ multæ, quæ simul cum eo ascenderant Jerosolyam. **42** Et cum jam sero esset factum (quia erat parasceve, quod est ante sabbatum), **43** venit Joseph ab Arimathæa nobilis decurio, qui et ipse erat expectans regnum Dei, et audacter introivit ad Pilatum, et petiit corpus Jesu. **44** Pilatus autem mirabatur si jam obiisset. Et accersito centurione, interrogavit eum si jam mortuus esset. **45** Et cum cognovisset a centurione, donavit corpus Joseph. **46** Joseph autem mercatus sindonem, et deponens eum involvit sindone, et posuit eum in monumento quod erat excisum de petra, et advolvit lapidem ad ostium monumenti. **47** Maria autem Magdalene et Maria Joseph aspiciebant ubi poneretur.

**Cap. 16** **1** Et cum transisset sabbatum, Maria Magdalene, et Maria Jacobi, et Salome emerunt aromata ut venientes ungerent Jesum. **2** Et valde mane una sabbatorum, veniunt ad monumentum, orto jam sole. **3** Et dicebant ad invicem : Quis revolvat nobis lapidem ab ostio monumenti ? **4** Et respicientes viderunt revolutum lapidem. Erat quippe magnus valde. **5** Et introëntes in monumentum viderunt juvenem sedentem in dextris, coopertum stola candida, et obstupuerunt. **6** Qui dicit illis : Nolite expavescere : Jesum quæritis Nazarenum, crucifixum : surrexit, non est hic, ecce locus ubi posuerunt eum. **7** Sed ite, dicite discipulis ejus, et Petro, quia præcedit vos in Galilæam : ibi eum videbitis, sicut dixit

vobis. **8** At illæ exeuntes, fugerunt de monumento : invaserat enim eas tremor et pavor : et nemini quidquam dixerunt : timebant enim.

**9** Surgens autem mane prima sabbati, apparuit primo Mariæ Magdalene, de qua ejecerat septem dæmonia.

**10** Illa vadens nuntiavit his, qui cum eo fuerant, lugentibus et flentibus. **11** Et illi audientes quia viveret, et visus esset ab ea, non crediderunt.

**12** Post hæc autem duobus ex his ambulantis ostensus est in alia effigie, euntibus in villam : **13** et illi euntes nuntiaverunt ceteris : nec illis crediderunt. **14** Novissime recumbentibus illis undecim apparuit : et exprobravit incredulitatem eorum et duritiam cordis : quia iis, qui viderant eum resurrexisse, non crediderunt. **15** Et dixit eis : Euntes in mundum universum prædicate Evangelium omni creaturæ. **16** Qui crediderit, et baptizatus fuerit, salvus erit : qui vero non crediderit, condemnabitur. **17** Signa autem eos qui crediderint, hæc sequentur : in nomine meo dæmonia ejicient : linguis loquentur novis : **18** serpentes tollent : et si mortiferum quid biberint, non eis nocebit : super ægros manus imponent, et bene habebunt.

**19** Et Dominus quidem Jesus postquam locutus est eis, assumptus est in cælum, et sedet a dextris Dei. **20** Illi autem profecti prædicaverunt ubique, Domino cooperante, et sermonem confirmante, sequentibus signis.